

## XI

**1407-I-30, Segovia.— Notificación del nombramiento del mariscal Ferran García de Herrera como capitán para la guerra. (A.M.M. Cart. Real 1391-1412, fol. 8r-v.)**

Don Juan por la gracia de Dios rey de Castiella, de Leon, de Toledo, de Gallizia, de Sevilla, de Murçia, de Jahen, del Algarbe, de Algezira, e señor de Vizcaya e de Molina: a todos los conçeios, e alcalles, e cavalleros, e escuderos, e ofiçiales, e omes buenos de todas las çibdades, e villas e lugares del reyno de Murçia, e a qualquier o a qualesquier de vos que esta mi carta vieredes o el traslado della signado de escrivano publico, salut e gracia.

Sepades que Ferrand Garçia de Herrera, mi mariscal, me enbio dezir quel rey don Enrrique, mi padre, e mi señor, que Dios de Santo Parayso (aya), que le enbio y al dicho reyno de Murçia que estoviese en mi serviçio en la frontera de los moros, e diz que le dio una su carta para vosotros que le acogesedes en todas las dichas çibdades e villas e logares del dicho reyno de Murçia, e fiziesedes e conpliesedes todas las cosas que vos él dixiese e mandase que cunpliesedes a mi serviçio e segund que esto e otras cosas mas conplidamente en le dicha carta del dicho rey mi padre e mi señor se contiene, e diz que se reçela que la non queredes guardar nin conplir en todo, segund que se en ella se contiene, por quanto el dicho rey mi padre e mi señor es finado e enbiome pedir por merçed que fiziese en ello lo que cunpliese a mi serviçio, e yo tovelo por bien.

Porque vos mando, a todos e a cada uno de vos, que veades la dicha carta quel dicho rey mi padre e mi señor dio en esta razon al dicho mi mariscal, e la guardedes e la fagades guardar e conplir en todo e por todo bien e conplidamente segund en ella se contiene, por tal manera quel dicho mariscal pueda fazer las cosas que cunplen a mi serviçio. Ca yo por esta mi carta le afirmo la dicha carta quel dicho señor rey mi padre, le dio en esta razon, e todo lo en ella contenido, e los unos e los otros non fagades ende por alguna manera so pena de la mi merçed e de los cuerpos e de quanto avedes, e de como esta mi carta vos fue mostrada, e los unos e los otros la cunplieredes mando sola dicha pena a qualquier escrivano publico que para esto fuere llamado que de ende al que vos la mostrare testimonio signado con su signo porque yo sepa en como conplides mi mandado.

Dada en la çibdat de Segovia, treynta dias de Enero año del nasçimiento del nuestro Salvador Ihesuchristo de mill e quatroçientos e siete años. Yo Gutierre Diaz la fiz escribir por mandado de los señores Reyna e Infante, tutores de nuestro señor el rey. Yo la Reyna. Yo el Infante.

